

大般若波羅蜜多經卷第四百六十一

唐三藏法師玄奘奉 詔譯

第二分巧便品第六十八之二

爾時具壽善現復白佛言。世尊。佛說菩薩摩訶薩。應於般若波羅蜜多。常勤修學耶。佛告善現。如是如是。我說菩薩摩訶薩。應於般若波羅蜜多。常勤修學。善現。若菩薩摩訶薩。欲於諸法得大自在。當學般若波羅蜜多。所以者何。甚深般若波羅蜜多。具大勢力。令諸菩薩摩訶薩眾。於一切法得自在故。善現。當知甚深般若波羅蜜多。是諸善法所趣向門。譬如大海。是

一切水所趣向門。是故善現。若聲聞乘補特伽羅。若獨覺乘補特伽羅。若菩薩乘補特伽羅。皆應於此甚深般若波羅蜜多。常勤修學。善現。諸菩薩摩訶薩。於此般若波羅蜜多。勤修學時。應於布施波羅蜜多。乃至靜慮波羅蜜多。亦常修學。應於內空。乃至無性自性空。亦常安住。應於眞如。乃至不思議界。亦常安住。應於苦集滅道聖諦。亦常安住。應於四念住。乃至八聖道支。亦常修學。應於四靜慮。四無量。四無色定。亦常修學。應於八解脫。乃至十遍處。亦常修學。應於空無相無願解脫門。亦常修學。應於菩薩摩訶薩地。亦

常修學。應於一切陀羅尼門。三摩地門。亦常修學。應於五眼六神通。亦常修學。應於如來十力。乃至十八佛不共法。亦常修學。應於無忘失法。恆住捨性。亦常修學。應於一切智道。相智。一切相智。亦常修學。應於一切菩薩摩訶薩行。亦常修學。應於諸佛無上正等菩提。亦常修學。應於一切智智。亦常修學。善現。如善射人。甲冑堅固。弓箭如意。不懼怨敵。諸菩薩摩訶薩。亦復如是。攝受般若波羅蜜多。方便善巧。備諸功德。一切魔軍。外道異論。所不能屈。是故善現。若菩薩摩訶薩。欲疾證得一切智智。應勤修學。甚深般若波羅

蜜多。善現。若菩薩摩訶薩。能於般若波羅蜜多。常勤修學。便爲十方無量無數無邊世界諸佛世尊。常共護念。具壽善現白言。世尊。云何菩薩摩訶薩。常勤修學甚深般若波羅蜜多。便爲十方無量無數無邊世界諸佛世尊。常共護念。佛告善現。若菩薩摩訶薩。能於般若波羅蜜多。常勤修學。則能修行布施波羅蜜多。乃至修行一切智智。由此十方無量無數無邊世界諸佛世尊。常共護念。具壽善現復白佛言。是菩薩摩訶薩。云何修行布施波羅蜜多。乃至修行一切智智。便爲十方無量無數無邊世界諸佛世尊。常共護

念。佛告善現。是菩薩摩訶薩。修行布施波羅蜜多時。觀布施波羅蜜多不可得。乃至修行一切智智時。觀一切智智不可得。故爲十方無量無數無邊世界諸佛世尊。常共護念。復次善現。如是十方無量無數無邊世界諸佛世尊。如色不可得。故常共護念。是菩薩摩訶薩。如受想行識不可得。故常共護念。是菩薩摩訶薩。乃至如一切智智不可得。故常共護念。是菩薩摩訶薩。復次善現。如是十方無量無數無邊世界諸佛世尊。不以色故。常共護念。是菩薩摩訶薩。不以受想行識故。常共護念。是菩薩摩訶薩。乃至不以一切

智智故。常共護念。是菩薩摩訶薩。具壽善現。復白佛言。諸菩薩摩訶薩。雖多處學。而無所學。佛告善現。如是如是。諸菩薩摩訶薩。雖多處學。而無所學。所以者何。實無有法。可令菩薩摩訶薩眾。於中修學。具壽善現。復白佛言。世尊。爲諸菩薩摩訶薩。或畧或廣。宣說六種波羅蜜多相應之法。若菩薩摩訶薩。欲疾證得一切智智。於此六種波羅蜜多相應法界。若畧若廣。皆應聽聞。受持讀誦。究竟通利。旣通利已。如理思惟。旣思惟已。審正觀察。正觀察已。令心心所。於所緣相。皆不復轉。佛告善現。如是如是。如汝所說。復次善現。

諸菩薩摩訶薩。於佛世尊。所說六種波羅蜜多相應
法教。若畧若廣。勤修學時。應於諸法。如實了知畧廣
之相。具壽善現白言。世尊。云何菩薩摩訶薩。於一切
法。如實了知畧廣之相。佛告善現。若菩薩摩訶薩。如
實了知色真如相。受想行識真如相。如實了知眼處
真如相。乃至意識真如相。如實了知色處真如相。乃
至法處真如相。如實了知眼界真如相。乃至意識真
如相。如實了知色界真如相。乃至法界真如相。如實
了知眼識界真如相。乃至意識界真如相。如實了知
眼觸真如相。乃至意識觸真如相。如實了知眼觸爲緣

所生諸受眞如相。乃至意觸爲緣所生諸受眞如相。
如實了知地界眞如相。乃至識界眞如相。如實了知
因緣眞如相。乃至增上緣眞如相。如實了知無明眞
如相。乃至老死眞如相。如實了知布施波羅蜜多眞
如相。乃至般若波羅蜜多眞如相。如實了知內空眞
如相。乃至無性自性空眞如相。如實了知苦聖諦眞
如相。集滅道聖諦眞如相。如實了知四念住眞如相。
乃至八聖道支眞如相。如實了知四靜慮眞如相。四
無量四無色定眞如相。如實了知八解脫眞如相。乃
至十遍處眞如相。如實了知空解脫門眞如相。無相

無願解脫門眞如相。如實了知淨觀地眞如相。乃至
如來地眞如相。如實了知極喜地眞如相。乃至法雲
地眞如相。如實了知一切陀羅尼門眞如相。一切三
摩地門眞如相。如實了知五眼眞如相。六神通眞如
相。如實了知如來十力眞如相。乃至十八不共法
眞如相。如實了知三十二大士相眞如相。八十隨好
眞如相。如實了知無忘失法眞如相。恆住捨性眞如
相。如實了知一切智眞如相。道相智一切相智眞如
相。如實了知預流果眞如相。乃至獨覺菩提眞如相。
如實了知一切菩薩摩訶薩行眞如相。諸佛無上正

等菩提眞如相。如實了知一切智智眞如相。是菩薩摩訶薩。於一切法。如實了知畧廣之相。具壽善現白言。世尊。云何色眞如相。受想行識眞如相。乃至云何一切智智眞如相。諸菩薩摩訶薩。如實了知。當於中學。於一切法。如實了知畧廣之相。佛告善現。色眞如無生無滅。亦無住異。而可施設。是名色眞如相。受想行識眞如。無生無滅。亦無住異。而可施設。是名受想行識眞如相。乃至一切智智眞如。無生無滅。亦無住異。而可施設。是名一切智智眞如相。諸菩薩摩訶薩。如實了知。當於中學。於一切法。如實了知畧廣之相。

復次善現。若菩薩摩訶薩。如實了知色實際相。受想
行識實際相。乃至如實了知一切智智實際相。是菩
薩摩訶薩。於一切法。如實了知畧廣之相。具壽善現
白言。世尊。云何色實際相。受想行識實際相。乃至云
何一切智智實際相。諸菩薩摩訶薩。如實了知。而於
中學。於一切法。如實了知畧廣之相。佛告善現。無色
際。是名色實際相。無受想行識際。是名受想行識實
際相。乃至無一切智智際。是名一切智智實際相。諸
菩薩摩訶薩。如實了知。當於中學。於一切法。如實了
知畧廣之相。復次善現。若菩薩摩訶薩。如實了知色

法界相。受想行識法界相。乃至如實了知一切智智法界相。是菩薩摩訶薩。於一切法。如實了知畧廣之相。具壽善現白言。世尊。云何色法界相。受想行識法界相。乃至云何一切智智法界相。諸菩薩摩訶薩。如實了知。而於中學。於一切法。如實了知畧廣之相。佛告善現。色如虛空。無障無礙。無生無滅。無斷無續。而可施設。是名色法界相。受想行識如虛空。無障無礙。無生無滅。無斷無續。而可施設。是名受想行識法界相。乃至一切智智如虛空。無障無礙。無生無滅。無斷無續。而可施設。是名一切智智法界相。諸菩薩摩訶

薩如實了知。當於中學。於一切法。如實了知。畧廣之相。具壽善現白言。世尊。諸菩薩摩訶薩。復云何應知一切法畧廣之相。佛告善現。若菩薩摩訶薩。如實了知一切法不合不散。是菩薩摩訶薩。應如是知一切法畧廣之相。具壽善現白言。世尊。何等一切法不合不散。佛告善現。色不合不散。受想行識不合不散。眼處乃至意處。不合不散。色界乃至法處。不合不散。眼界乃至意界。不合不散。色界乃至法界。不合不散。眼識界乃至意識界。不合不散。眼觸乃至意觸。不合不散。眼觸爲緣所生諸受。乃至意觸爲緣所生諸受。不

合不散。地界乃至識界。不合不散。因緣乃至增上緣。不合不散。無明乃至老死。不合不散。貪欲瞋恚愚癡。不合不散。欲界色界無色界。不合不散。布施波羅蜜多。乃至般若波羅蜜多。不合不散。內空乃至無性自性空。不合不散。眞如乃至不思議界。不合不散。苦集滅道聖諦。不合不散。四念住乃至八聖道支。不合不散。四靜慮。四無量。四無色定。不合不散。八解脫。乃至十遍處。不合不散。空無相無願解脫門。不合不散。淨觀地乃至如來地。不合不散。極喜地乃至法雲地。不合不散。一切陀羅尼門。三摩地門。不合不散。五眼六

神通。不合不散。如來十力乃至十八不共法。不合不散。三十二大士相八十隨好。不合不散。無忘失法。恆住捨性。不合不散。一切智道相智一切相智。不合不散。預流果乃至獨覺菩提。不合不散。一切菩薩摩訶薩行。不合不散。諸佛無上正等菩提。不合不散。一切智智。不合不散。有爲界。不合不散。無爲界。不合不散。所以者何。如是諸法。皆無自性。若無自性。則無所有。若無所有。則不可說有合有散。諸菩薩摩訶薩。於一切法。如是了知。則能了知畧廣之相。具壽善現白言。世尊。如是名爲畧攝一切波羅蜜多。諸菩薩摩訶

薩。若於中學能多所作。世尊。如是畧攝波羅蜜多。初修業菩薩摩訶薩。於中應常修學。乃至住第十地菩薩摩訶薩。亦於中應常修學。世尊。若菩薩摩訶薩。學此畧攝波羅蜜多。於一切法。能如實知畧廣之相。佛告善現。如是如是。如汝所說。善現。當知如是畧攝波羅蜜多法門。諸菩薩摩訶薩。利根者能入。鈍根者不能入。等利根者能入。非等利根者不能入。勤精進者能入。不勤精進者不能入。具正念者能入。不具正念者不能入。具妙慧者能入。具惡慧者不能入。善現。若菩薩摩訶薩。欲住不退轉地。當勤方便。入此法門。若

菩薩摩訶薩。乃至欲住第十地。當勤方便。入此法門。若菩薩摩訶薩。乃至欲得一切智智。當勤方便。入此法門。善現。若菩薩摩訶薩。如此般若波羅蜜多所說而學。是菩薩摩訶薩。則能隨學布施波羅蜜多。乃至般若波羅蜜多。亦能隨學內空。乃至無性自性空。亦能隨學眞如。乃至不思議界。亦能隨學苦集滅道聖諦。亦能隨學四念住。乃至八聖道支。亦能隨學四靜慮。四無量。四無色定。亦能隨學八解脫。乃至十遍處。亦能隨學空無相無願解脫門。亦能隨學諸菩薩地。亦能隨學一切陀羅尼門。三摩地門。亦能隨學五眼。

六神通。亦能隨學如來十力。乃至十八不共法。亦能隨學無忘失法。恆住捨性。亦能隨學一切智道。相智一切相智。亦能隨學一切菩薩摩訶薩行。亦能隨學諸佛無上正等菩提。亦能隨學一切智智。善現。若菩薩摩訶薩。如如依止甚深般若波羅蜜多所說而學。是菩薩摩訶薩。如是如是。轉近所求一切智智。善現。若菩薩摩訶薩。如此般若波羅蜜多所說而學。是菩薩摩訶薩。所有業障及諸魔事。隨起卽滅。是故善現。若菩薩摩訶薩。欲疾滅除一切業障及諸魔事。欲正攝受巧方便力。當學般若波羅蜜多。復次善現。若

時菩薩摩訶薩。行此般若波羅蜜多。修此般若波羅蜜多。習此般若波羅蜜多。是時菩薩摩訶薩。便爲十方無量無數無邊世界諸佛世尊。現說法者。常共護念。所以者何。善現。過去未來現在諸佛。無不皆從甚深般若波羅蜜多而出現故。是故善現。若菩薩摩訶薩。能行般若波羅蜜多。當作是念。過去未來現在諸佛所證得法。我亦當得。如是善現。諸菩薩摩訶薩。應勤修學甚深般若波羅蜜多。若勤修學甚深般若波羅蜜多。疾能證得一切智智。是故善現。諸菩薩摩訶薩。常應不捨甚深般若波羅蜜多。相應作意。修行般

若波羅蜜多。復次善現。若菩薩摩訶薩。於此般若波羅蜜多。如實修行。經彈指頃。所獲福聚。其量甚多。假使有人。教化三千大千世界一切有情。皆令安住布施淨戒安忍精進靜慮般若。或令安住解脫及解脫智見。或令安住預流果。乃至獨覺菩提。是人雖得無量福聚。而猶不及如實修行甚深般若波羅蜜多。經彈指頃。所獲福聚。何以故。善現。如是般若波羅蜜多。能生一切布施淨戒安忍精進靜慮般若波羅蜜多。能生一切解脫及解脫智見。能生一切預流果。乃至獨覺菩提。現在十方無量無數無邊世界諸佛世尊。

無不皆由甚深般若波羅蜜多而得出現。過去未來諸佛亦爾。復次善現。若菩薩摩訶薩。能不遠離甚深般若波羅蜜多相應作意。修行般若波羅蜜多。經須臾頃。或經半日。或經一日。或經半月。或經一月。或經一時。或經一歲。或經百歲。若復過此。是菩薩摩訶薩。所獲福聚其量甚多。勝教十方各如殑伽沙等世界。一切有情。皆令安住。布施淨戒安忍精進靜慮般若。或令安住解脫及解脫智見。或令安住預流果。乃至獨覺菩提。所獲功德。所以者何。由此般若波羅蜜多。出生過去未來現在諸佛世尊。爲諸有情。如實施設。

布施淨戒安忍精進靜慮般若波羅蜜多。如實施設
解脫及解脫智見。如實施設預流果乃至獨覺菩提。
如實施設諸佛無上正等菩提。故此福聚勝過於彼。
復次善現。若菩薩摩訶薩。如深般若波羅蜜多所設
而住。當知是菩薩摩訶薩。不復退轉。常爲諸佛之所
護念。成就最勝方便善巧。已曾親近供養無量百千
俱胝那庾多佛。於諸佛所。已種無量微妙善根。已爲
無量眞善知識之所攝受。已久修習布施波羅蜜多。
乃至般若波羅蜜多。已久安住內空。乃至無性自性
空。已久安住眞如。乃至不思議界。已久安住苦集滅

道聖諦。已久修習。四念住。乃至八聖道支。已久修習。四靜慮。四無量。四無色定。已久修習。八解脫。乃至十遍處。已久修習。空無相無願解脫門。已久修習。諸菩薩地。已久修習。一切陀羅尼門。三摩地門。已久修習。五眼六神通。已久修習。如來十力。乃至十八不共法。已久修習。一切智道相智。一切相智。已久修習。一切菩薩摩訶薩行。已久修習。諸佛無上正等菩提。已久修習。一切智智。當知是菩薩摩訶薩。住童真地。一切所願。無不滿足。常見諸佛。無時暫捨。於諸善根。恆不遠離。常能成熟。所化有情。常能嚴淨。所居佛土。從

一佛國趣一佛國。供養恭敬尊重讚歎諸佛世尊。聽受修行無上乘法。當知是菩薩摩訶薩。已得無斷無盡辯才。已得微妙陀羅尼法。成就最上微妙色身。已得諸佛授圓滿記。於隨所樂。爲度有情。受諸有身。已得自在。當知是菩薩摩訶薩。善入所緣。善入行相。善入字法。善入非字法。善入言說。善入不言說。善入一語。善入二語。善入多語。善入女語。善入男語。善入非女男語。善入過去時語。善入未來時語。善入現在時語。善入諸義。善入諸文。善入色。善入受。善入想。善入行。善入識。善入蘊。善入處。善入界。善入緣起。善入緣

起支。善入世間。善入涅槃。善入法相。善入有爲相。善入無爲相。善入有爲無爲相。善入行相。善入非行相。善入相相。善入非相相。善入有性。善入非有性。善入自性。善入他性。善入合。善入離。善入合離。善入相應。善入不相應。善入相應不相应。善入眞如。善入不虛妄性。善入不變異性。善入法性。善入法界。善入法定。善入法住。善入緣性。善入非緣性。善入諸聖諦。善入靜慮。善入四無量。善入四無色定。善入六波羅蜜多。善入四念住。乃至八聖道支。善入八解脫。乃至十遍處。善入陀羅尼門。善入三摩地門。善入三解脫門。善

入一切空性。善入五眼。善入六神通。善入如來十力。乃至十八佛不共法。善入無忘失法。善入恆住捨性。善入一切智。善入道相智。善入一切相智。善入有爲界。善入無爲界。善入界。善入非界。善入色作意。乃至識作意。善入眼處作意。乃至意處作意。善入色處作意。乃至法處作意。善入眼界作意。乃至意界作意。善入色界作意。乃至法界作意。善入眼識界作意。乃至意識界作意。善入眼觸作意。乃至意觸作意。善入眼觸爲緣所生諸受作意。乃至意觸爲緣所生諸受作意。善入地界作意。乃至識界作意。善入因緣作意。乃至

至增上緣作意。善入無明作意。乃至老死作意。善入
布施波羅蜜多作意。乃至般若波羅蜜多作意。善入
內空作意。乃至無性自性空作意。善入眞如作意。乃
至不思議界作意。善入苦集滅道聖諦作意。善入四
念住作意。乃至八聖道支作意。善入四靜慮四無量
四無色定作意。善入八解脫作意。乃至十遍處作意。
善入空無相無願解脫門作意。善入淨觀地作意。乃
至如來地作意。善入極喜地作意。乃至法雲地作意。
善入一切陀羅尼門三摩地門作意。善入五眼六神
通作意。善入如來十力作意。乃至十八佛不共法作

意善入三十二大士相八十隨好作意善入無忘失
法恆住捨性作意善入一切智道相智一切相智作
意善入預流果作意乃至獨覺菩提作意善入一切
菩薩摩訶薩行作意善入諸佛無上正等菩提作意
善入一切智智作意善入色色相空善入受想行識
受想行識相空如是乃至善入一切智智一切智智
相空善入輕安道善入不輕安道善入生善入滅善
入住異善入正見善入邪見善入見善入非見善入
貪瞋癡善入無貪無瞋無癡善入一切見纏隨眠結
縛善入一切見纏隨眠結縛斷善入名善入色善入

名色善入所緣緣。善入增上緣。善入因緣。善入等無
間緣。善入行。善入相。善入因。善入果。善入苦集滅道。
善入地獄及地獄道。善入傍生及傍生道。善入鬼界
及鬼界道。善入人及人道。善入天及天道。善入預流
預流果。預流果道。善入一來一來果。一來果道。善入
不還不還果。不還果道。善入阿羅漢。阿羅漢果。阿羅
漢果道。善入獨覺。獨覺菩提。獨覺菩提道。善入一切
菩薩摩訶薩。及一切菩薩摩訶薩行。善入一切如來
應正等覺。及諸佛無上正等菩提。善入一切智。及一
切智道。善入道相智。及道相智道。善入一切相智。及

一切相智道。善入根。善入根圓滿。善入根勝劣。善入
慧。善入疾慧。善入利慧。善入速慧。善入力慧。善入達
慧。善入廣慧。善入深慧。善入大慧。善入無等慧。善入
眞實慧。善入珍寶慧。善入過去世。善入未來世。善入
現在世。善入方便。善入願有情。善入意樂。善入增上
意樂。善入文義相。善入諸聖法。善入安立三乘方便。
善現。若菩薩摩訶薩。行深般若波羅蜜多。引深般若
波羅蜜多。修深般若波羅蜜多。得如是等種種勝利。
爾時具壽善現白佛言。世尊。諸菩薩摩訶薩。云何行
深般若波羅蜜多。云何引深般若波羅蜜多。云何修

深般若波羅蜜多。佛告善現。諸菩薩摩訶薩。應觀色乃至識彫落故。破壞故。離散故。不自在故。不堅實故。性虛偽故。行深般若波羅蜜多。善現。汝問諸菩薩摩訶薩。云何引深般若波羅蜜多者。諸菩薩摩訶薩。應如引虛空空。引深般若波羅蜜多。善現。汝問諸菩薩摩訶薩。云何修深般若波羅蜜多者。諸菩薩摩訶薩。應破壞諸法。修深般若波羅蜜多。具壽善現。復白佛言。世尊。諸菩薩摩訶薩。應經幾時。行深般若波羅蜜多。引深般若波羅蜜多。修深般若波羅蜜多。佛告善現。諸菩薩摩訶薩。應從初發心。乃至安坐妙菩提座。

行深般若波羅蜜多。引深般若波羅蜜多。修深般若波羅蜜多。具壽善現復白佛言。世尊。諸菩薩摩訶薩。應住何等心無間。行深般若波羅蜜多。引深般若波羅蜜多。修深般若波羅蜜多。佛告善現。諸菩薩摩訶薩。應從初發心。乃至安坐妙菩提座。無容橫起諸餘作意。唯常安住一切智智相應作意。行深般若波羅蜜多。引深般若波羅蜜多。修深般若波羅蜜多。善現。是菩薩摩訶薩。乃至能令心心所法。於境不轉。乃得名爲行深般若波羅蜜多。引深般若波羅蜜多。修深般若波羅蜜多。世尊。諸菩薩摩訶薩。行深般若波羅

蜜多。引深般若波羅蜜多。修深般若波羅蜜多。當得一切智智不。不爾善現。世尊。諸菩薩摩訶薩。不行深般若波羅蜜多。不引深般若波羅蜜多。不修深般若波羅蜜多。當得一切智智不。不爾善現。世尊。諸菩薩摩訶薩。於深般若波羅蜜多。亦行亦不行。亦引亦不引。亦修亦不修。當得一切智智不。不爾善現。世尊。諸菩薩摩訶薩。於深般若波羅蜜多。非行非不行。非引非不引。非修非不修。當得一切智智不。不爾善現。世尊。若爾。諸菩薩摩訶薩。云何當得一切智智。善現。諸菩薩摩訶薩。當得一切智智。如眞如。世尊。云何眞如。

善現。如實際。世尊。云何實際。善現。如法界。世尊。云何法界。善現。如我界。有情界。命者界。生者界。養者界。士夫界。補特伽羅界。世尊。云何我界。乃至補特伽羅界。善現。於意云何。若我。若有情。若命者。若生者。若養者。若士夫。若補特伽羅。爲可得。不也。世尊。善現。若我。乃至補特伽羅。旣不可得。我當云何可施設我界。乃至補特伽羅界。如是善現。若菩薩摩訶薩。不施設般若波羅蜜多。亦不施設一切智智。亦不施設一切法。是菩薩摩訶薩。定當證得一切智智。具壽善現。復白佛言。爲但般若波羅蜜多不可施設。爲靜慮波羅蜜

多。乃至布施波羅蜜多。亦不可施設耶。佛告善現。非但般若波羅蜜多不可施設。靜慮波羅蜜多乃至布施波羅蜜多。亦不可施設。若聲聞法。若獨覺法。若菩薩法。若如來法。亦不可施設。善現。以要言之。一切法。若有爲。若無爲。皆不可施設。具壽善現。復白佛言。若一切法。皆不可施設。云何可施設。是地獄。是傍生。是鬼界。是人。是天。是預流。是一來。是不還。是阿羅漢。是獨覺。是菩薩。是如來。是一切法耶。佛告善現。於意云何。有情施設及法施設。實可得。善現對曰。不也。世尊。佛告善現。若有情施設及法施設。實不可得。我云

何可施設。是地獄。是傍生。是鬼界。是人。是天。是預流。是一來。是不還。是阿羅漢。是獨覺。是菩薩。是如來。是一切法。如是善現。諸菩薩摩訶薩。行深般若波羅蜜多時。應學一切法。皆不可施設。而趣無上正等菩提。具壽善現白言。世尊。諸菩薩摩訶薩。行深般若波羅蜜多時。豈不應於色學。豈不應於受想行識學。如是乃至。豈不應於一切智智學。佛告善現。諸菩薩摩訶薩。行深般若波羅蜜多時。應於色學。不增不減。應於受想行識學。不增不減。如是乃至。應於一切智智學。不增不減。具壽善現白言。世尊。諸菩薩摩訶薩。行深

般若波羅蜜多時。應云何於色學不增不減。應云何於受想行識學不增不減。如是乃至應云何於一切智智學不增不減。佛告善現。諸菩薩摩訶薩。行深般若波羅蜜多時。以不生不滅故。於色應學。以不生不滅故。於受想行識應學。如是乃至以不生不滅故。於一切智智應學。具壽善現白言。世尊。諸菩薩摩訶薩。行深般若波羅蜜多時。應云何以不生不滅故。於色學。應云何以不生不滅故。於受想行識學。如是乃至應云何以不生不滅故。於一切智智學。佛告善現。諸菩薩摩訶薩。行深般若波羅蜜多時。應於色不起不

作諸行若修若遣故學。應於受想行識不起不作諸行若修若遣故學。如是乃至應於一切智智不起不作諸行若修若遣故學。具壽善現白言。世尊。諸菩薩摩訶薩。行深般若波羅蜜多時。應云何於色不起不作諸行若修若遣故學。應云何於受想行識不起不作諸行若修若遣故學。如是乃至應云何於一切智智不起不作諸行若修若遣故學。佛告善現。諸菩薩摩訶薩。行深般若波羅蜜多時。應以觀一切法自相皆空。於色不起不作諸行若修若遣故學。應以觀一切法自相皆空。於受想行識不起不作諸行若修若

遣故學。如是乃至應以觀一切法自相皆空。於一切智智不起。不作諸行。若修若遣故學。

大般若波羅蜜多經卷第四百六十一

校譌

第二紙六行

北藏善現二字。南藏作應於。

音釋

胄

直又切。兜鍪也。怨敵。怨於袁切。怨讐也。敵。此云天

堂來。河名也。以從高處來故。俱胝。梵語也。此云百。殊。其陵其拯二切。伽求迦切。億。胝。張尼切。

那庾多

梵語也。此云萬億。庾。弋渚切。

大般若波羅蜜多經卷四百六十一

四

崑一

